

ԳՐՈՂԻ ԲՈՂՈՔԸ

(Նամակ խմբագրության)

Պ<արոն> Գ. Մելիք-Կարապետյանն իր «Իմ պատասխանը Մշակի խմբագրությանը» վերնագրով հոդվածում (Տարագ, № 8) ի միջի այլոց «Մշակի» խմբագրությանն ասում է. «Դուք չե՞ք, որ խեղդել եք ամեն մի նոր (և թե հին) գրական ուժ, եթե այդ ուժը հանդգնում է չհավատալ, որ «Մշակն» է որ կա. դուք չե՞ք, որ տիրելով մամուլին, ոչնչացրել եք քննադատություն, նոր միտք և գրագետների մի ամբողջ սերունդ:

Եթե ձեզ թվում են մեր գանգատները անտեղի, ցույց տվեք գրական ուժեր, որ երևան է հանել «Մշակը» (Ահարոնյանը գուցե միակ)...»:

Ես բողոքում եմ պ. Մելիք-Կարապետյանի այս խոսքերի դեմ: «Գազեթը» երբեք չի կարող գրողների սերունդ ոչնչացնել, ինչպես և չի կարող առաջացնել: Գրողն ու գրականությունն այնպիսի չնչին երևույթներ չեն, որոնց վրա լրագիրն ունենա ճակատագրական ազդեցություն:

Մի ժամանակ մեր մեջ այդպես էին կարծում: Մեր խմբագիրներն էլ հրապարակավ պնդում էին, թե իրանք են ստեղծել այս կամ այն գրողին, ինչո՞ւ — որովհետև աշխատակցել է իրանց: Գրողներին նրանք համարում էին իրանց զինվորներ — իրանց պատվիկ դրոշակի տակ, և եթե մի գրող հեռանար նրանց թերթից, համարվում էր ընենգատ, դավաճան, փախստական, ենթարկվում էր անվերջ հալածանքի ու հայհոյանքի:

Անվերադառնալի անցան այդ ժամանակները: Գրողին առաջ բերող ու խեղդող հանգամանքների մեջ «գազեթը» մի շատ ողորմելի բան է: Իսկական գրողն արհամարհանքով կանցնի դրանց մոտից, և ի՞նչ ունի դրանց հետ:

Միայլ է, զուր պատիվ է, որ անում է պ. Մելիք-Կարապետյանը «Մշակին» հավատացնելով, որ նա խեղդել է կամ առաջ է բերել գրողներ: Եթե նա խեղդելու ուժ ունենար, մեզանում գրողներ չէին լինիլ, իսկ եթե առաջ բերելու կարողություն ունենար—մեր գրողները բոլորովին ուրիշ մարդիկ կլինեին, մարդիկ, որոնց անունները իրանք էլ են մոռացել:

Ինչ վերաբերում է պ. Ահարոնյանին, ես չգիտեմ նրա գրական ծննդաբանությունը, բայց դարձյալ նույն օրենքով ես նրան էլ չեմ համարում «Մշակի» ծնունդ: